



Број/Број: 03/1-50-1-7-44-6/09

Сарајево/Сарајево: 26.10.2009.

ČLANOVIMA ZAJEDNIČKE KOMISIJE ZA ODBRANU I SIGURNOST

Predmet: Informacija o radnoj posjeti institucijama SAD-a, od 3. do 10.10.2009.

Veza, akt broj: 03/1,03/11-05-399/09, od 15.9. 2009.

Predstavnici Zajedničke komisija za odbranu i sigurnost BiH, na poziv guvernera i Nacionalne garde savezne države Merilend (Maryland), boravili su u radnoj posjeti institucijama SAD-a: Kongresu, Senatu, State Departmentu, Pentagonu, te Skupštini, guverneru, Glavnom štabu Nacionalne garde i Agenciji za upravljanje kriznim situacijama (MEMA) države Merilend. Posjeta je realizirana uz podršku države Merilend i Nacionalne garde, s ciljem proširenja partnerstva na oblast civilno-vojnih odnosa, u okviru programa MIL-to-MIL.

Delegaciju Zajedničke komisije za odbranu i sigurnost BiH činilo je njeno rukovodstvo: Branko Zrno, Šefik Džaferović, Slobodan Šaraba, te Dragica Hinić, sekretar. U pratnji Zajedničke komisije, u ulozi prevodilaca iz ODC (Odjel Evropske komande Oružanih snaga SAD-a) i Ambasade SAD-a u Sarajevu, bile su Alena Vajukić-Baćak i Sabina Maričić.

Posjeta je realizirana od 3. do 10.10.2009., u gradovima Vašington (Washington), od 3. do 7.10.2009., te Baltimor i Anapolis (Annapolis), od 7. do 10.10.2009.

4. 10. 2009.

Prvi dan članove Komisije posjetio je i pozdravio načelnik Nacionalne garde savezne države Merilend brigadni general Adkins. Istakao je izuzetno dobru dosadašnju saradnju s predstavnicima Ministarstva odbrane BiH i Oružanih snaga BiH, te izrazio nadu za nastavkom dobre saradnje i s predstavnicima Zajedničke komisije i civilnih struktura BiH u cjelini.

5.10.2009.

Tokom drugog dana, u prostorijama Asocijacije guvernera saveznih država, predstavnicima Zajedničke komisije su Dana Thomson iz Odjeljenja za nacionalnu sigurnost i Catherine Elder iz Ureda guvernera savezne države Merilend, prezentirali pitanja vezana za strukturu Komisije za

raspodjelu sredstava i proces raspodjele sredstava, s posebnim osvrtom na budžetsku godinu saveznih država i federalnog nivoa.

Istog dana u State Departmentu održan je sastanak sa Džonom Bazbijem (Johnom Buzbee), v.d. direktorom, i Džejsonom Hilandom (Jason Hyland), direktorom Ureda za Evropu i euroazijske poslove. Teme razgovora odnosile su se na dosadašnji angažman bh. vojnika u Iraku, pitanja budućih angažmana u mirovnim misijama, kao i pitanja priključenja BiH NATO-u i EU. Navedeni predstavnici State Departmenta zahvalili su se BiH na dosadašnjem angažmanu pripadnika Oružanih snaga BiH u Iraku, te izrazili nadu za narednim aktivnostima u drugim mirovnim misijama. Također, pružili su punu podršku nastojanjima BiH na njenom putu ka euroatlantskim integracijama.

Nakon realizacije navedenih aktivnosti obavljena je posjeta Ambasadi BiH u Vašingtonu i tom prilikom razgovarano sa Nj.E.ambasadorom Mitrom Kujundžićem i ostalim zaposlenim.

6.10.2009.

Tokom ovog dana održano je više sastanaka.

Prvi sastanak upriličen je s predstavnicima State Departmenta i Ureda za političko-vojna pitanja Džejsom Lorensom (James Lawrence) i Markom Adamsom. Na ovom sastanku razgovarano je o pitanjima vezanim za Strategiju uklanjanja mina i uništavanja viška vojne opreme i naoružanja u BiH. Predstavnici State Departmenta ponudili su pri tome BiH pomoć pri uništavanju viška oružja i municije, ali su istakli da je neophodno da takav zvaničan formalan zahtjev treba stići iz naše zemlje. Članovi Zajedničke komisije ovom prilikom izrazili su i nezadovoljstvo dosadašnjim radom Fonda za deminiranje, pri čemu im je naglašeno da uništavanje viška oružja i municije, za što nam se nudi pomoć, nema doticaja s tim fondom. Gosp. Adams istakao je da bi zvaničan formalni zahtjev, koji bi BiH trebalo da uputi Kongresu, trebalo da sadržava iznos potrebnih sredstava za uništavanje oružja i municije sa specifikacijom (koji bi izračunalo Ministarstvo odbrane BiH i Zajednički štab OSBiH, npr. posebno za puške, mitraljeze, za municiju i sl. po vrsti, kalibru i težini u tonama). Ministar odbrane BiH bi potom, nakon odgovarajućih procedura koje od njega zahtijevaju bh. propisi, zvaničan zahtjev s navedenom specifikacijom dostavio Ambasadi SAD-a u BiH, koja bi dalje zahtjev prosljedila Kongresu SAD-a. Ovakav formalni zahtjev trebalo bi prosljediti i za deminiranje. Članovi Zajedničke komisije podržali su navedene prijedloge i naglasili da će inicirati aktivnosti kako bi se oni realizirali.

Kao poseban vid saradnje istaknuta je i edukacija vojnog osoblja za dugoročno uništavanje viška naoružanja i municije, koju navedeni Ured ostvaruje sa zemljama u našem regionu kroz regionalni pristup smanjenju viška naoružanja (RACR). Prva radionica o navedenoj temi održana je u Zagrebu, sljedeća je planirana u Budvi, a naredna bi trebalo da bude održana za šest mjeseci, možda i u Sarajevu.

Dalje su održani sastanci sa savjetnicima u Komisiji za vanjske poslove Senata iz Ureda senatora Kerija (Carrie) i senatora Lugera, Džejsonom Bruderom (Jason Bruder) i Dilonom Gatrijem (Dillon Guthrie). Razgovarano je o Zakonu za ubrzanje ulaska BiH u NATO, koji su oni pripremili i o lobiranju za njegovo izglasavanje.

Tokom popodneva predstavnici Zajedničke komisije susreli su se s kongresmenom iz Merilenda Rupersbergerom (Dutch Ruppertsberger), koji je predsjedavajući Komisije za nadzor nad obavještajnim poslovima, te član Komisije za raspodjelu sredstava. Tokom susreta razmijenjena su mišljenja o problemima u završnom procesu reforme odbrane (pitanje vlasništva nad državnom imovinom i sl.). Kongresmena je zanimalo pitanje konkretne pomoći koju bi on mogao pružiti BiH u Kongresu, pri čemu mu je odgovoreno da je tu, prije svega, potrebna podrška Zakonu o ubrzanju ulaska BiH u NATO-u, koji se tek treba naći u proceduri pred Kongresom.

U drugom dijelu dana predstavnici Zajedničke komisije posjetili su Pentagon, gdje su imali sastanke s Džoom MekMilanom (Joe McMillan), zamjenikom pomoćnika ministra odbrane SAD-a i Bilom Hadsonom (Bill Hudson), pukovnikom KOV i vojnim advokatom, koji je prezentirao odnose između Ureda ministra odbrane i Kongresa. Tokom susreta razgovarano je o sistemu rada Nacionalne garde Merilenda, PFP-u, učešću BiH u misijama u Iraku i Afganistanu, vojnoj imovini, značaju državnih službenika u radu Ureda ministra odbrane i Kongresa i sl., te ponovo istaknuta zahvalnost za podršku koju je BiH dala u mirovnoj misiji u Iraku.

U kasnim večernjim satima izvršen je obilazak zapadnog krila Bijele kuće gdje se nalazi i Ovalni ured.

7.10.2009.

U prijepodnevnim satima održan je sastanak sa senatorom Evan Bajom (Evan Bayh) i njegovim osobljem. Tom prilikom senator je posebno govorio o institutu hiringa (hearing) - javnog saslušanja i izrazio da je njegova suština odgovornost prema javnosti. Zahvalio se na dolasku i izrazio poršku našim nastojanjima na putu ka euroatlantskim integracijama.

Zbog iznenadnog zasjedanja Kongresa, pomenutog dana nisu održani planirani susreti s dva kongresmena.

U popodnevnim satima članovi delegacije otputovali su u Baltimor.

8.10.2009.

U Anapolisu, u prijepodnevnim satima, predstavnici administracije Skupštine savezne države Merilend prezentirali su rad ove skupštine kroz teme o komunikaciji između agencija zaduženih za javnu sigurnost, sredstvima za vojni odjel, obuku pripadnika Nacionalne garde, ulogu Agencije za krizne situacije, budžet i sl.

Potom je upriličen susret s guvernerom Merilenda Martinom O' Mejljem (Martin O' Malley) i njegovim osobljem. U razmjeni mišljenja dotaknuta su pitanja o procesu pregovora o promjenama

Ustava BiH, reformi odbrane i sl. Guverner je izrazio bezrezervnu podršku BiH na njenom putu ka euroatlantskim integracijama.

8.10.2009.

Predstavnici Agencije države Merilend za upravljanje kriznim situacijama (MEMA) prezentirali su značaj Operativnog centra prilikom djelovanja u kriznim situacijama i saradnji vojnih i civilnih struktura u tom procesu.

Tokom dana realiziran je obilazak Operativnog centra MEMA-e.

Zaključci:

1. Navedena posjeta izuzetno je značajna zbog ostvarenog procesa lobiranja za predstojeće punopravno članstvo BiH u NATO-u, jer je uslijedila nakon neposredne predaje zahtjeva BiH u MAP;
2. Predstavnici SAD-a izrazili su izuzetnu zahvalnost BiH za njeno dosadašnje angažiranje OSBiH u mirovnoj misiji u Iraku;
3. Od ministra odbrane BiH i načelnika Zajedničkog štaba OSBiH neophodno je zatražiti da se odmah uključe u proces formalizacije zahtjeva Kongresu, putem Ambasade BiH u Sarajevu, za doniranje sredstava za uništavanje viška oružja i municije sa specifikacijom (po vrsti, kalibru i težini u tonama). Ovakav formalni zahtjev trebalo bi proslijediti i za sredstva za deminiranje.

PREDSJEDAVAJUĆI KOMISIJE

Branko Zrno

Dostavljeno:

- naslovu
- a/a